



Clemens Pfister e sia dunna Annamaria han realisau ina specialmein biala decoraziun d'advent a Schlans. FOTO SUSI ROTHMUND

Aunc 15 finiastras entochen Nadal

Finiastras d'advent envidan da spassegiar tras vias e streglias

SUSI ROTHMUND/FMR

■ **Suenter massa onns datti ussa puspei ina ga in a Schlans. A Tujetsch datti uonn negin, persuenter datti in ad Andast e Segnas, Falera, Morissen, Schluein, Castrisch, Glion, Danis-Tavanasa, Laax, Val s. Pieder ed en auters loghens. Manegiai ein ils «calenders d'advent surdimensionals» cun 24 «finiastras». Decoraziuns che carmalan da contemplar e smarvigliar da tonta tarlischur ch'annunzia la magia da Nadal.** Las seras d'unviern ein magari liungas. Uonn che quasi tut ei serrau ni scumandau paran ellas dubel liungas e perquei seporschan spassegiadas nocturnas pir ch'enzacu. Tut ei curclau cun neiv e l'atmosfera – silmeins quella dalla natira – pascheivla. En biars vitgs vegnan las finiastras d'advent aviartas dapi l'entschatta december. Entochen ils 24 dat ei mintga di ina sorpresa ed ina nova decoraziun da scuvierer e selegrar. Spassegiadas els vitgs vischinonts ni egl agen – cun capetscha, vonns e buns calzers – pudesan esser in highlight digl advent 2020 ed entochen Buania. Ils nums da quellas e quels che han creau las decoraziuns ein publicai el Fegl ufficial, sin tabla nera ed en entgens loghens perfin online cun ruta e tut. Las spassegiadas en gruppas, ils aperos cun vin cauld e tustgets ni seras da cant e praulas ein deplorablaein tabu uonn. Far cumadeivel san ins denton era

a casa el ravugl dalla famiglia, tier glischs da candelas, cun mams, in bien sitg e buna luna.

Suenter decennis puspei

Normalmein organischa l'Uniu da giuventegna da Schlans mintg'onn ina sentupada per la populaziun. Quei sa esser ina sentupada d'advent en casa da scola, ina fiasta dil vitg duront la stad ni in di da far piziultas comunablaein e guder in bien sitg. Uonn ei tut quei buca stau pusseivel e perquei ha Tamara Jemmi-Cristani giu l'idea d'organisar finiastras d'advent. Ladinamein ha Selina Pfister, la cassiera dall'uniun entschiet ad encurir persunas ch'ei promtas da far ina decoraziun. Ins pudess supponer che quei seigi tut auter che sempel en in vitget cun sulettamein ver 80 habitontas e habitonts. Sco Pfister ha detg sin domanda dalla FMR, eis ei denton buca stau in batlegiar ed ils da Schlans hagian plascher da quell'idea. La dunna ei memia giuvna per seregurdar ch'ei havess dau enzacu tontas finiastras d'advent el vitget. Clemens Pfister manegia denton ch'ei possi haver dau in «calender d'advent» avon biebein 20 onns. El e sia dunna Annamaria han gia aviert lur finiastra ch'ei tut auter che «mo» ina finiastra. Igl um pensiunau ha numnadamein zambergiau ina casetta e cul cuntegn tut aparti fa quella ina bellezza paretta avon casa (Ustria Chispàcius). Ella vischnaunca da Tujetsch dat ei uonn mo


singulas finiastras decoradas. Leu vegn «la via d'advent» numnadamein organisada sulet ils onns che la fiera ha buca liug e quei alternond ellas fracziuns. Uonn havess l'Uniu da dunnas Tujetsch giu d'organisar la fiera d'advent mo quella han ei stuiu dar giu ed ei fust stau memia tard per organisar las finiastras d'advent. Persuenter envidan las finiastras dalla casa da scola da far in paus e guder las creaziuns da scolaras e scolaras.

Iniziativa privata

Avon onns organisava l'Uniu da dunnas da Castrisch las finiastras d'advent. Pli tard ha Lisa Walder fatg quei sin iniziativa privata ed avon circa quater onns ha Corina Schweizer surpriu quei pensum. Sco ella ha declarau alla FMR, eis ella ina dunna creativa cun grond plascher da realisar decoraziuns d'advent. Ei fussi stau immens donn da schar curdar quei usit e perquei hagi ella surpriu l'organiziun. Biars decoreschien onn per onn ina finiastra d'advent. Sch'in ni l'auter hagi buca (pli) temps ni plascher sche seigi ei d'encurir novas familias che procurien per ina decoraziun. Entochen ussa hagi ei adina funcziunau, era sch'ei seigi gia capitau ch'ella sezza hagi decorau duas finiastras. «Igl ei bi dad ir tras il vitg e scuvierer mintga di ina nova sorpresa. Quei gaudan biars indigens, hosps da vacanzas ed era persunas d'auters vitgs», di Corina Schweizer.



Era quei ei ina decoraziun gartegiada ch'ei d'anflar a Schlans. FOTOS SUSI ROTHMUND



Tgi che va la sera tras Castrisch, engarta enzanua quellas bialas glischs da Nadal. MAD

BREIL

Plazza militara vegn buca pli duvrada naven 2025

(rtr/fmr) Igl areal e l'infrastructura dall'armada a Breil vegnan buca pli duvrari naven digl onn 2025 per motivs militars. Ei s'extracta dalla plazza da tir per la defensiu d'aviuns. Per quei motiv sclarescha Armasuisse in diever futur entras auters interessents. Quei ha cusseglier guvernativ Peter Peyer detg la mesjamma en ina risposta ad ina dumonda tschen-tada el Cussegl grond. La scola da polizia dalla Svizra orientala che ha adina puspei nezegiau l'infrastructura per la scolaziun ha negin interess da surprender quella per diever permanent. Il baghetg niev ei vegnius inauguraus igl onn 2000.

ANDERMATT SEDRUN

Diember da hosps vegn limitaus

(cdm/fmr) L'Arena da skis Andermatt-Sedrun limitescha il diember da hosps per di sin 8000. Quella limita vala pigl entir territori d'Andermatt entochen Sedrun. Sco l'interpresa scriva en ina comunicaziun als mieds da massa, eis ei aschia pusseivel da garantir las mesiras da proteziun concernent il coronavirus. Il sistem da reservaziun cumprovau al Gemsstock vegn extendius. Naven dils 12 da december 2020 eis ei era necessari da reservar il viadi culla teleferica dil GütschExpress. Cun quellas mesiras less l'arena da skis impedir liungas colonnas da spetga. Per la fin d'jamna dils 12 e 13 da december 2020 vegn il diember da hosps limitaus sin 4500 damai che buca tuts indrez ein aunc en funcziun. Memadamein risguarda l'interpresa las mesiras dil Cussegl federal pertuocent ils restaurants. Als hosps vegn cussegliu da far la cumpra da cartas a moda digitala.

NADAL

422 pac

(fmr/abc) Sco dapi plirs onns ei ina squadra da dunnas sursilvanas separticipada all'acziun «Pacs da Nadal» a favur dalla Missiun cristiana digl ost. Il temps da rimnar eis staus limitaus tochen ils 14 da november, pervia dalla logistica e transport ellas tiaras da destinaziun eis ei stau in cuort termin.

Il camiu ch'ei vegnius gliendisgis, ils 16 da november si dalla Bassa en Surselva per rimnar ils pac, ei buca vegnius per nuot. «Nus essan ferg engrazievlas dalla gronda solidaritad. 422 pac havein nus astgau rimnar», scriva il team dalla organisaturas sursilvanas el Fegl ufficial.

Tut ils pac ha il camiu transportau a Worb sper Berna, ella centrala dalla Missiun cristiana digl ost. Las coordinaturas sursilvanas han il basegns d'engraziar resentidamein a familias e persunas singulas che han susteniu l'acziun a favur da basignus. Suenter ils 20 da november ei il convoi cun pac da Nadal dalla Svizra, rimnai comunablaein da quater ovras d'agid caritativ, partius per l'Europa digl ost. Ella Moldavia, Ucraina e Rumenia selegran numerus carschi ed affons sin in pac cun cuntegn adattau e definiu. Dil diember total rimnau en Surselva ha l'uniun da dunnas da Sagogn contribuui 120 pac.

reclama



Filisurer Miet-Christbaum

Die nachhaltige Alternative

Filisur: Alpin Baumschulen, Riesenwahl 8 Arten, Online-Shop
 später geschnitten - länger haltbar - Lieferung ganze Schweiz
 gartencenter@schutzfilisur.ch, Tel. 081 410 40 70

Colorado-Christbaum

Neue edelblaue Tanne

schutz filisur

seit 1905 Alpin Baumschulen

CUORSA LIUNGA

Negin Maraton dalla Surselva 2021

(fmr/hh) Sco quei ch'ils organisatur communicesch sin Facebook, sa il Maraton dalla Surselva 2021 a Sedrun buca vegnir arranschaus. Il motiv ei la situaziun da restricziuns en connex cul coronavirus.

Il mument vesi il comite d'organiziun negina schanza da porscher quella concurrenza da cuorsa liunga ella fuorma prevedida. Sco quei ch'il president dil comite, Guido Friberg scriva, hagi il comite stuiu prender quella decisiun cun grev cor. Ei seigi denton impurtont da comunicar quei ad uras e buca da spitgar entochen il davos mument. Aunc buca decidiu eis ei en tgei fuorma che las cuorsas dils affons e giuvenils san vegnir organisadas.

Ei s'extracta da concurrenzas dil Raiffeisen Nordic Cup e dil Cup nordic Energia alpina ils 30 da schaner 2021. Tenor Guido Friberg ein ils organisatur en discuors cull'associaziun da cuorsa liunga per tscherchar soluziuns. Il proxim Maraton dalla Surselva ei fixaus sils 30 da schaner 2022.

ENSEMEN

10 onns Grappa giuvenila «ensemén»

(fmr/gc) La Grappa regionala giuvenila «ensemén» exista dapi diesch onns – sco quei ch'ins sa leger el Fegl parochial grischun. Ella cumpeggia affons e giuvenils ord las pleivs da Panaduz, Razén, Domat/Favugn, Laax e Falera.

Iniziantz ein stai: Edith Messer-Jörg, catecheta ed engaschada ella lavur ecclesiastica cun giuventegna, Flem, sco era il plevon da Domat: sur Gregor Barmet. Dil team directiv fan oz era part: carschi. Ili plevons dallas pleivs involvidas e giuvenils, stai sezs pli baul activs.

Grond e bi program

Il program annual dalla Grappa «ensemén» cumpeggia: in camp d'Anceinza, dis da recreaziun, passentai sill'Alp da Stierva, ina fin d'jamna per scolaras e scolars dil scalem superiu e weekends per tuts. Participonts e participontas ein entusiasma e fascina dalas purschidas. Tuttas occurrenzas ein colligiadas cun cardientscha vivida comunablaein.

«Sco ina gronda famiglia»

Secund la menadra Edith Messer-Jörg ei la Grappa regionala da giuvenils sco ina gronda famiglia. Tensiuns e problems cun la disciplina dat ei ton sco negins. Mintgadi vegn assistiu alla s. messa.

Bi eis da ver anteriuras ed anteriurs participonts sco menaders da gruppas. Edith Messer-Jörg ei zun satisfatga che la grappa ei stada ensemén era suenter ch'ils commembers vevan finiu il temps obligatoric da scola.

Ina bandiera pil giubileum

David Cadalbert, Domat, ha procurau sil giubileum da diesch onns dalla Grappa ina bandiera per «ensemén». Quei ei stau in'emperneivla sorpresa. Il funs ei melens sco il sulegl. Il logo muossa in trianghel (per la ss. Trinidad), in cor (carezia per Diu ed il proxim), la crusch (Jesus Christus) ed il cametg (energia, spass e legria).